

## چیلینگار (çilingar) / یوسف عبادیان

قدیم زمانلار، بیز اوشاق اولان واختلار، چیلینگار گلردی محله یه. چیلینگار گلیب، بیر دووارین کۆلگه سینده بالاجا بیر کیلیم

پارچاسینی آچاردی، ایشینده ایشلتدیگی نسنه لری دوزردی قاباغینا، مشتری گۆزلردی. محله ده اوشاقلار خبر یایاردیلار «چیلینگار

گلیب!»، «چیلینگار گلیب!»

اونون یولونو گۆزله یین خانملار، اللرینده سینمیش اولان چینی ائو اشیالاریلا گلردیلر اوستانین یانینا، اوندان ایستردیلر او سینان چینیلری

یاپیشدیرسین. چیلینگار اله نمیش آهح له (آهک، ahah، əhəh) یومورتانین آغین قاتیپ، یاپیشقان بیرماده دوزلدردی. بو ماده برکیشنده

چینییه اوخشاردی. قاپین سینیق یثرین بو ماده ایله یاپیشدیراردی. چینی چاینیکلری یاپیشدیراندان سونرا پوشدردی (püşdəmək = بند

زدن) یعنی دمیر یا بورونج تیکه سیندن نازیک کسب چاینیکی اوستونه سیم ایله پوش آتاراردی. چینی دلمک اوچون اوخ کامانی

کیمی بیر کامانی و اوجوندا بورقویا (مته) اوخشار لوله بیر آغاجی اولاردی. کامانین کیریشین دولاردی او بورقونون دوره سینه کامانی

دالی قاباغا آپاراندا بورقونو فیرلاداردی، چینی دلیب، پوشدردی.



1